

河南通志

河南通志卷之五十九

人物三

河南府

漢劇孟洛陽人以俠顯文帝時吳楚反周亞夫乘傳至河南得孟喜曰吳楚舉大事而不求孟吾知其無能爲矣是時天下騷動大將軍得之若一敵國云

楊僕宜陽人武帝時以千夫長爲吏河南太守按舉以爲能遷御史使督盜賊關東僕治倣尹齊以敢擊稍遷主爵都尉及南越叛拜僕爲樓船將軍伐之有功封將梁侯

賈捐之字君房洛陽人累太傅誼曾孫元和中上疏

言事召待詔金馬門時珠厓郡數年壹反辨議大發
軍捐之建議以爲不當學帝問丞相于定國定國曰
捐之議是於是下詔棄珠厓後以忤石顯被誅士論
惜之

郭賀字喬卿洛陽人祖堅伯父游君並修清節光武
時賀累官尙書令曉習故事多所匡益拜荊州刺史
百姓誦之顯宗賜以三公服勅行部去轡帷使百姓
見其容服以彰有德徵拜河南尹以清靜稱卒於官
龐參字仲達緱氏人舉孝廉拜右校令永初中御史
中丞樊準上疏薦參可用召拜謁者後爲漢陽太守
擲強扶弱以惠政得民累遷太尉錄尙書事後疾詔

遣小黃門視致羊酒以久病罷卒於家

神嵩字景伯洛陽人仲山甫之後順帝時舉孝廉爲
侍御史自以職主刺舉志案姦回凡刺史二千石殘
穢不勝任者悉免遣案罪出爲益州刺史在職三年
宣恩遠夷開曉殊俗岷山雜落皆懷服漢德復爲梁
州刺史被徵吏人詣闕請留太后以其得人心復留
一年遷漢陽太守夷戎男女送至漢陽界嵩與指謝
千里不得乘車到郡化行羗獠轉遼東太守烏桓望
風率服迎拜界上後遷南郡太守入爲尙書會并涼
被寇擢爲度遼將軍誠心懷撫賞罰分明由是羗夷
西域皆來服入爲大司農遷司徒及卒并涼人咸爲

發哀北邊聞之舉國傷悼每入朝望見墳墓轉哭泣
祭祀

杜密字周甫陽城人爲人沉質少有厲俗志爲司徒
胡廣所辟累遷北海相宦官子弟爲令長有姦惡者
輒捕案之行春到高密見鄭康成爲鄉佐知其異器
卽召署郡職與荀昱李膺王暢輩同稱八俊後拜太
僕黨事起免歸本郡與李膺俱坐而名行相次故時
人亦稱李杜云

尹勲字伯元華人家世衣冠伯父睦爲司徒兄頌爲
太尉宗族多居貴位而勲獨持清操不以地勢尙人
初舉孝廉三遷邯鄲令政有異迹又舉高第五遷尚

書令及桓帝誅梁冀勲參建大謀封都鄉侯拜汝南
太守上書奏釋范滂等黨議禁錮與郭泰宗慈范滂
等同謂之八顧顧者言能以德行引人時又有八及
八厨皆海內知名士終大司農

三國郤正字令先偃師人祖儉靈帝末益州刺史正父
揖因留蜀正安貧好學弱冠能屬文仕蜀漢爲秘書
吏轉令史官至巴西太守景耀七年後主入洛惟正
及殿中督張通隨侍後主恨知正之晚所著詩論賦
之屬垂百篇

晉趙整字文業洛陽人苻秦時爲散騎常侍盡忠匡諫
時秦主堅頗好酒色整嘗爲詩上之曰昔聞孟津河

千里有一曲此水本自清是誰使令濁堅正色曰朕之過也

〔南北朝〕張宗之字益本鞏縣人仕元魏爲侍御中散賜爵鞏縣侯進彭城公出爲雍州刺史宗之在官以忠謹稱太和中卒贈建節將軍謚曰敬

趙肅字慶雍洛陽人早有操行知名於時元魏孝昌中起家殿中侍御史累遷左將軍大中大夫封清河縣子復除廷尉卿加東征將軍肅執法平允凡所處斷咸得其情廉慎自持不事產業時人稱之

房謨字敬叔洛陽人仕西魏歷昌平代郡太守所在廉惠神武入洛拜潁川大守徵爲丞相右長史以清

直被賞遇謨悉心殫力知無不爲天平三年行定州
事出爲兗州刺史廣布恩信百姓安之轉徐州刺史
謨在兗州彭城慕其政化及爲刺史合境欣悅累遷
驃騎大將軍攝南汾州事境接西魏前後降附者謨
皆撫接殷勤人樂爲用卒贈司空諡文惠

高隆之字延興洛陽人深沉有志氣行臺于暉引爲
郎中與魏神武深相結納後從起兵山東累遷并州
刺史入爲尚書右僕射時初給人田權貴皆占肥美
隆之啟神武均之又領營構大將以十萬夫撤洛陽
宮殿運於鄴增築南城周二十五里又鑿渠引漳水
繞城郭造水碾磑並利於民武定中除尚書令遷太

保卒贈太尉欽尚文雅縉紳名流必以禮接遇訓督諸子必先文義世以此重之

韓雄字木蘭東垣人少敢勇工騎射有將略及孝武西遷雄遂慷慨有立功之志西魏大統初舉兵洛西與河南行臺楊琚共爲犄角所向輒克入周封武陽縣侯以功拜河南尹閔帝卽位進爵新義郡公雄在邊久具知敵人虛實每率衆深入不避艱難前後經四十五戰而志氣益壯東魏憚之卒於鎮贈大將軍五州諸軍事諡曰威

韓褒字宏業潁陽人祖襲仕魏爲平涼郡守父演恒州刺史褒值魏末喪亂避地夏州時周文帝爲刺史

素聞其名待以客禮及爲丞相引爲錄事參軍是二年拜丞相府司馬累封三水縣伯出爲北雍州刺史以平盜功入爲給事黃門侍郎累遷至少保褒歷事三朝以忠厚見知周武帝深相敬重卒贈涇岐燕三州刺史諡曰貞子繼伯仕隋位終衛尉少卿

元偉字猷道洛陽人少好學能文性溫柔小心謹慎與物無忤仕周累遷幽州都督府長史隨尉遲迥平蜀六官建拜師氏下大夫保定二年遷成州刺史政尙清靜百姓悅附流民復業者三千餘口天和元年入爲匠師中大夫轉司宗中大夫建德二年轉司會中大夫兼民部中大夫四年使主報聘於齊爲所執

六年齊平高祖以其久被幽繫加授上開府庾信贈
詩曰號亡垂棘反齊平寶鼎歸其爲當時所重如此
元暉字叔平洛陽人祖琛魏刺史父翌尙書左僕射
暉少好學仕周補相府中兵參軍遷武伯下大夫時
突厥入寇令暉賁錦綵十萬出使暉陳說利害可汗
大悅遣其名王隨獻方物八隋累轉兵部尙書拜魏
州刺史頗有惠政卒諡曰元子肅嗣

宇文慶字神慶洛陽人沉深有器局頗涉經史仕周
爲驃騎大將軍加開府從武帝攻河陰先登攀堞與
賊短兵接戰良久中石墜絕而復蘇帝勞之曰卿之
餘勇可賈也復從破高緯拔高壁克并州下信都禽

高潛功並居最下詔褒美進位大將軍封汝南郡公尋以行軍總管平延安卒於家

元孝友洛陽人滄州刺史爲政溫和平於政理嘗陳黨族間隣徵發之弊定妻妾之制婚葬之禮在官積年以法自守甚著聲稱齊天保初與元暉業同爲文宣所害

長孫覽字休因洛陽人父紹遠仕周爲小宗伯覽性宏雅有器量略涉書記尤曉鍾律明帝時拜車騎大將軍每公卿上奏必令省讀及誅宇文護以功封薛國公入隋仕終涇州刺史所在並有政績子洪北平太守有惠政

元文遙字德遠洛陽人敏慧夙成濟陰王暉業每云
此子王佐才也時何遜集初入洛文遙一覽便誦時
年十餘歲邢邵曰此殆古來未有仕北齊累官尙書
左僕射歷事三主諳習世務因魏宰縣多用廝役文
遙以縣令爲字人之官密令搜揚貴游子弟用之士
人爲縣自此始文遙性和厚與物無競初有田十餘
頃爲人侵奪及貴其人尙在將家逃竄文遙追還慰
撫還以與之彼人愧不受相讓久之遂爲閒田出爲
西兗州刺史徵入朝卒子行恭有父風兼俊才開皇
中位尙書郎

元景皓洛陽人魏昭成皇帝五世孫高祖虔封陳留

王父祚襲爵祚卒景皓嗣性剛毅天保時誅諸元親
近其疏宗議請姓高氏景皓云豈得棄本宗隨他姓
大丈夫寧可玉碎不能瓦全文宣乃收景皓誅之家
屬徙彭城

元豫字景豫洛陽人與景皓同祖美容儀有器幹位
終東徐州刺史

元景安洛陽人景皓同祖兄弟沉敏有幹局仕北齊
初爲襄縣令累遷兼七兵尙書時初築長城鎮戍未
立詔景安與諸將緣塞以備守督領旣多且所部軍
人富於財物賄貨公行文宣聞之遣使推檢唯景安
纖毫無犯帝深嘉嘆乃以所斂賊絹五百疋賜之以

彰清節天統四年除豫州刺史武平三年授行臺尙書令封歷陽郡王入周以大將軍討賊戰没子仁累官丹陽太守

隋周搖字世安洛陽人少剛毅仕周歷鳳楚二州刺史封夔國公隋初拜定州總管文獻皇后自京師赴州道經搖所主禮甚薄旣而白后曰公廨甚富於財限法不敢輒費又王臣無効私其質直如此帝以其奉法每嘉之卒諡曰恭

韓擒虎字子通東垣人雄子少慷慨以膽畧稱博通經史周文見而異之以軍功稍遷儀同三司襲爵新義郡公開皇初拜廬州總管委以平陳之任乃率五

百騎宵濟襲取采石進攻姑熟半日而拔陳軍望風奔潰遂入金陵執陳主叔寶文帝下優詔曰申國威於萬里宣朝化於一隅高名塞於宇宙盛業光於天壤逖聽前古罕聞其匹以功進位上柱國封新義公年五十五卒子世諤嗣侑儻驍捷有父風

韓僧壽字元慶東垣人擒虎弟亦以勇烈知名仕周爲侍伯中旅下大夫以功授大將軍封昌樂公開皇初拜安州刺史後以行軍總管破突厥於雞頭山後爲靈州總管再破突厥進位上柱國封江都郡公煬帝卽位改封新蔡郡公

韓洪字叔明東垣人僧壽弟少驍勇善射膂力過人

仕周以軍功拜大都督積功封甘棠縣侯開皇初進
爵爲公歷官代州總管仁壽元年突厥犯塞洪率衆
拒於恒安洪四面搏戰潰圍出煬帝北巡拜隴西太
守未幾珠厓民王萬昌作亂詔洪擊平之加金紫光
祿大夫領郡如故俄而萬昌弟仲通復叛洪又討平
之旋師遇疾卒

元亨字德良一名孝才洛陽人父季海元魏司徒馮
翊王周太祖以亨功臣子優禮之歷武衛將軍勲州
刺史周宣帝時爲洛州刺史平梁康邢流水亂入隋
拜太常卿出爲衛州刺史加大將軍在職八年風化
大洽後以病乞骸骨吏人詣闕上表請留臥治卒諡